

Visoki predstavnik naložio izbor gradonačelnika Mostara u skladu sa Statutom



Danas je visoki predstavnik naložio Vijeću Grada Mostara da provede izbor gradonačelnika Mostara u skladu sa Statutom Grada Mostara.

U skladu sa ovim nalogom, Vijeće Grada Mostara mora osigurati provođenje izbora u roku od sljedećih 30 dana, tajnim glasanjem kako je to predviđeno Statutom.

Nalog je izdat nakon današnjeg sastanka ambasadora zemalja članica Upravnog odbora Vijeća za provedbu mira, kojim je predsjedavao visoki predstavnik. Upravni odbor je razgovarao o ovom pitanju u više navrata.

Donijevši odluku, visoki predstavnik je izjavio da "godinu dana nakon izbora, ne mogu zamisliti daljnja odlaganja korištenja svih mehanizama koje nudi Statut". On je dodao da su "građani Mostara uporno tražili da gradski vijećnici stvore uvjete za funkcionalan grad, a Upravni odbor Vijeća za provedbu mira je uporno pozivao političke predstavnike da se dogovore oko rješenja".

Kao rezultat činjenice da gradonačelnik nije izabran, nije usvojen ni gradski budžet. "Ova situacija je neodrživa i njome se riskira potpuni zastoj javnih službi i u konačnici – životi se dovode u opasnost", rekao je Inzko.

Visoki predstavnik očekuje da Gradsko vijeće usvoji budžet za Mostar što je prije moguće odmah nakon što se imenuje gradonačelnik.